

四庫全書

子部

欽定四庫全書

唐開元占經卷五十七

唐 瞿曇悉達 撰

辰星占五

辰星犯南方七宿

辰星犯東井一

文曜鉤曰辰星入東井蠻夷君憂有死者若邊兵起期
不出年 郝萌曰辰星入東井軍在外星進兵退星退

兵進 河圖曰辰星出入東井有暴兵馬當貴 荊州

占曰辰星出入東井有亂臣 黃帝曰辰星守東井為

水

天文志曰光武建武三十年閏月甲午水在東井二十度生白氣東南指焰長五尺為彗東北行至紫宮

西藩工五月甲子不見凡見三十一日水常以夏至後
效東井閏月在四月尚未當見而見是躁而進也東井
為水衝水出之為大水是歲五月及明年
郡國大水壞城郭傷禾稼殺人民也

感精符曰辰

星守東井去之七寸七日已上至十五日王者誅大臣
期不出百八十日 石氏曰守東井其年旱旱晚水一
曰天下大水又曰法臣相戮一曰入其中王者易更政

甘氏曰守東井若角動色赤黑以水起兵 色黃潤澤
天子有善令若色變大人憂天下有名水絕所謂絕者
逆行而入之 郝萌曰辰星久守東井為金錢易萬物
五穀不成一曰守東井胡兵起五穀霜死其國尤甚歲
大惡 辰星入犯乘守東井三日以上蠻夷君當之死
期三月若一年二年三年 石氏曰犯東井守錢大臣
誅鉞鉞用有兵起 荊州占曰守東井道上多死人
陳卓曰守東井百川皆溢

辰星犯輿鬼二

河圖曰辰星犯輿鬼為國有憂大臣誅 石氏曰有兵
一曰犯天質兵起 郝萌曰犯輿鬼亂臣在內 黃帝
曰犯輿鬼質執法者誅 南官侯曰犯天尸貴臣有罪
犯四星天子發之 郝萌曰入犯輿鬼執法者有戮死
若兵起將軍有憂人多死 甄曜度曰入輿鬼犯積尸
大臣有誅斧鑕用貴人有犯罪者若戮死 郝萌曰辰
星入輿鬼為大人卒事以命終 荊州占曰亂臣在內

有屠滅 天文志曰為死喪一曰大臣有死 陳卓曰
蠻夷之君有誅 春秋圖曰辰之鬼天下有疫病 郝
萌曰守與鬼月食若五穀不成 春秋圖曰民多病歲
大惡人飢亡一曰君有戮死者 春秋緯曰守犯與鬼
金錢發用民多痛耳目 石氏曰守與鬼有兵死者一
曰王者崩一曰大人有祭祀之事 海中占曰守與鬼
出其南水出其北旱 郝萌曰守與鬼三月后夫人疾
二十日太子夫人疾十日諸國王夫人病 守與鬼西

南為秦漢有反臣兵事以赦令解之 守輿鬼質星鉞
鉞用 守輿鬼有喪右為主人左為客一云五月大水
蝗蟲 海中占曰守入鬼大人憂 郝萌曰入若守輿
鬼為主憂財寶出若大臣有謀秉質者君貴人憂金玉
用民疾南入為男北入為女西入為老東入為壯棺木
貴 荊州占曰干犯守輿鬼隨所守王者發之不出七
十日天下有喪陽為人君陰為皇后左為太子右為貴

臣

天文志曰孝順漢安二年七月甲申辰星犯輿
鬼明年八月順帝崩孝沖即位明年正月崩

辰星犯柳三

石氏曰辰星犯柳有木功事若名木見伐者海中占
曰入天庫以水起 荊州占曰入注下刑上子訟父民
多仇粟貴大旱馬貴 春秋圖曰辰星之柳天下米貴
馬貴先潦後旱 黃帝占曰歲不收 甘氏曰王者賜客
若國有貴客 郝萌曰為反臣中外兵以德令解之一
曰舟船相望在於北方若處其陽大旱又死喪處其陰
大水為灾傷 玄冥占曰貴臣得地後有德令不出九

十日 郝萌曰辰星守柳注藥在酒食中忌不可食之

辰星犯七星四

郝萌曰辰星犯七星臣為亂 甘氏曰入七星有君置

太子者 春秋圖曰辰星之七星天下勞多流亡 郝

萌曰留七星為天下大憂

憂中兵也

石氏曰守七星民多

疾一曰民流千里又曰兵內起若守二十日以上有水

甘氏曰守七星若角動天下有兵三年乃解又曰萬

物不成 海中占曰大臣凶貴人有罪若法官有憂

郝萌曰為反臣中外兵以德令解之一曰大水為灾

此荆

州占也

巫咸曰犯七星三日以上賊臣在側若有叛臣皆九十日應之以善令則無咎

辰星犯張五

春秋圖曰辰星之張有賢人在下當為御相 石氏曰

守張天下大水兵起若守而角動有臣傷其君色赤有兵出其君傷諸侯之臣起於宮中從庖厨奉牢之間是也其色黑食中有藥不可食大人有憂 甘氏曰守張

貴臣專國天下不寧 巫咸曰萬物五穀不成 郝萌

曰為反臣中外兵以德令解之

謂赦令也

又曰夏麥不收

大飢一曰民多喪病又多鬪訟 南官候曰天下大飢
百二十占曰且有更令 郝萌曰入張若守之水入
火為逆理犯上天下不安下謀上多鬪訟若多疾

辰星犯翼六

王歷曰辰星入翼中兵大起 春秋圖曰辰星之翼有

賢在民間當用 石氏曰守翼水入火逆理貴臣有憂


若大臣有戮又曰水旱之灾星入其度當位者退之以
消天怒王者以赦除咎又曰守翼為萬物不成一曰為
人民流亡又曰鹽鐵大貴四倍牛馬行 甘氏曰守翼
大水兵起色白京師起色黃事成色青黑死事 巫咸
曰為旱 海中占曰有兵灾若大水在北方五穀不成
郝萌曰多火灾一曰火在北方又曰為反臣中外兵
以德解之 荊州占曰近臣為有亡國飢歲民流千里
若地龍見 陳卓曰王者有疾期不出年中 二十八

宿山經注曰辰星一年不出出于翼軫主死 玄冥占
曰守翼若有誅者 王厯曰有急事若有大風 陳卓
曰犯守翼天下大荒 班固天文志曰辰星與翼見西
方大臣誅

辰星犯軫七

石氏曰辰星入軫中為大兵起 巫咸曰伺其出日而
數之期二十日為兵發伺始入處之率一日期十日軍
罷 黃帝占曰守軫天下大疾貴者多死一曰國有喪

天文志曰守犯軫為白衣之會 石氏曰守軫萬物
五穀不成 郝萌曰守軫為反臣中外兵以德令解之
又曰執法貴臣凶車騎用 王厯曰天下疾疫人多死
其死灾多在北方 南官候曰戚臣凶 甄曜度曰入
軫及守犯之有兵必大戰有破軍殺將於其野人心驚
駭守過二十日以上光明色大有數十萬人戰流血積
尸殍不則大水有山河崩決百姓流波之災五穀傷敗
人民飢死期二年



唐開元占經卷五十七

欽定四庫全書

子部

唐開元占經卷

五十八至
六十一

詳校官中書臣李采

靈臺郎臣倪廷梅覆勘

總校官編修臣王熙緒

校對官庶吉士臣潘曾起

謄錄監生臣徐錫福

欽定四庫全書

唐開元占經卷五十八

唐瞿曇悉達撰

辰星占六

辰星犯石氏中官

辰星犯大角一

海中占曰辰星守大角臣謀主有兵起人主憂王者戒
慎左右期不出百八十日遠一年

辰星犯梗河二

巫咸曰辰星守梗河國有謀兵四夷兵起來侵中國邊境有憂

辰星犯招搖三

聖洽符曰辰星犯招搖邊兵大起四夷為寇若守之夷人敗若夷主死期不出二年

辰星犯玄戈四

聖洽符曰辰星犯玄戈邊兵大起侵掠為寇若守之夷

主死期不出二年

辰星犯天槍五

辰星犯天槍夷兵起機槍大用防戍有憂若誅邊臣期不出年

辰星犯天樞六

巫咸曰辰星犯天樞夷兵起機槍大用防戍有憂若誅邊臣期不出年

辰星犯女牀七

荊州占曰辰星犯女牀凶 甘氏曰犯守女牀兵起宮
中若后妃有暴誅者期百八十日遠一年

辰星犯七公八

黃帝占曰辰星守七公為饑民居不安 石氏曰犯守
七公輔臣有謀議臣相疑若人主有憂

辰星犯貫索九

荊州占曰辰星入天牢天下有賊又曰水期一年一曰
早期一年又曰歲饑人相食一曰大赦期百二十日

巫咸曰犯守貫索天下兵大起多有獄事貴人有死者
石氏曰入天牢中犯乘守者以獄多為亂不出年

辰星犯天紀十

文曜鉤曰辰星犯守天紀幸臣執權有兵王者有憂

辰星犯織女十一

黃帝占曰辰星犯守織女天下有女憂兵起不出其年
辰星犯天市垣十二

石氏曰辰星入天市大臣有誅
郝萌曰辰星入天市

中皆為將相凶一曰五官有憂一曰赦又曰辰星入若
守天市蠻夷之君戮又曰為驚一曰更市

辰星犯帝座十三

石氏曰辰星犯帝座為臣謀主有逆亂事 玄冥占
曰為臣謀主天下亂兵大起不出年

辰星犯候星十四

海中占曰辰星犯守候星陰陽不和五穀傷人民大饑
有兵起

辰星犯宦者十五

甘氏曰辰星犯宦者輔臣有誅若戮死期不出年

辰星犯宗正十六

石氏曰辰星犯宗正左右羣臣多死若更政令人主有憂

辰星犯宗人十七

石氏曰辰星犯宗人親族貴人有憂若有死者一日人主親宗有離絕者

辰星犯宗星十八

甘氏曰辰星犯宗星宗室之人有分離者

辰星犯東西咸十九

石氏曰辰星犯東西咸為臣不從令有陰謀

辰星犯天江二十

黃帝占曰辰星入天江大水決城郭 陳卓曰暴雨為害不出其年 巫咸曰犯守天江天下有水若入之大水齊城郭人民饑去其鄉

辰星犯建星二十一

陳卓曰辰星犯建星大臣相諧 百二十占曰辰星出
建星中國有水旱五穀不成人民饑不出年 郝萌曰
守建星地氣泄貴人多死一曰臣謀其主 荊州占曰
犯建星歲水人饑有自賣者

辰星犯天弁二十二

甘氏曰辰星犯天弁若守之則因徒起兵一曰五穀不
成糴大貴人民饑

辰星犯河鼓二十三

齊伯曰辰星犯河鼓大將若左右將將有誅若守之將有罪以五色占之 甘氏曰辰星入河鼓大將出用兵

辰星犯離珠二十四

石氏曰辰星犯離珠宮中有事若有亂宮者若宮人有罪黜者

辰星犯匏瓜二十五

辰星犯匏瓜三十日狗夜嗥雞鳴天下盡驚 聖洽符

曰犯守匏瓜天下有憂若有遊兵名果貴一曰魚鹽貴
十倍不出其年

辰星犯天津二十六

海中占曰辰星犯天津關道不通有兵起若關吏有憂
郝萌曰守天津兵革起

辰星犯螣蛇二十七

甘氏曰辰星守螣蛇天子前驅凶若姦臣有謀前驅為
害

辰星犯王良二十八

石氏曰辰星守王良為有兵 齊伯曰辰星犯守王良
天下有兵諸侯相攻彊臣謀主期不出年

辰星犯閣道二十九

石氏曰辰星犯閣道絕漢者為九州異政各主其主天
下有兵期二年

辰星犯附路三十

石氏曰辰星守附路太僕有罪若有誅一曰馬多死道

無乘者

辰星犯天將軍三十一

郝萌曰辰星入天將軍興軍者吉 石氏曰守天將軍
為大將軍死若誅

辰星犯大陵三十二

石氏曰辰星入大陵國有大喪大臣有誅若戮死人民
死者大半不出其年 荊州占曰辰星入大陵積尸天
下盡喪死人如丘山星衆兵起星稀無兵

辰星犯天船三十三

郝萌曰辰星守天船革也 聖洽符曰入天船或守之
兵大起舟船用有亡國期不出年

辰星犯卷舌三十四

石氏曰辰星乘卷舌天下多喪又曰守卷舌國有佞臣
謀其君以口舌為害人主有憂

辰星犯五車三十五

石氏曰辰星犯五車大旱若有喪一曰犯庫星兵起北

方若西方犯倉星穀貴若有水 元命包曰入五車則

水開

班固天文志曰大水

海中占曰兵大起車騎行五穀不成

天下民饑若軍絕糧

黃帝占曰入五車中犯乘守天

庫以水潦起兵

辰星犯天關三十六

石氏曰辰星行天關中每至抑揚當去不去徘徊亂行
光色隆怒見其妖祥中國隔絕道路不通 文曜鉤曰
守天關天下大水津梁不通人民饑有自賣期一年

石氏曰行天關為臣謀主 郝萌曰辰星守天關者皆為貴人多死 海中占曰辰星守犯天關道絕天下相疑關梁之令

辰星犯南北河三十七

黃帝占曰辰星乘南河戌若出南皆為中國 石氏曰守南河蠻夷兵起邊戌有憂若有旱災人民饑又曰留守南戌中方兵起 黃帝占曰辰星出北河戌間若留守北戌若居南戌間若守兩戌間為天下有難起道不

通 荊州占曰守兩河戌間天下乖離 郝萌曰失度
守陰門若陽門為諸侯姦又曰不行天門天關間為喪

辰星犯五諸侯三十八

石氏曰辰星犯五諸侯若守之兵大起將士出諸侯有
憂若有死者 巫咸曰辰星入五諸侯伺其出之日而
數之二十日兵起發伺始入處之率一日軍罷 石氏
曰守犯乘守五諸侯諸侯兵死期三年

辰星犯積水三十九

石氏曰辰星守積水旱 巫咸曰犯守積水其國有水
災水物不成魚鹽貴一曰以水為敗糴大貴人民饑期
二年

辰星犯積薪四十

甘氏曰辰星犯守積薪天下大旱五穀不登人民饑亡
辰星犯水位四十一

石氏曰辰星犯守水位天下以水為害津關不通一曰
大水入城郭浸傷人民皆不出二年

辰星犯軒轅四十二

黃帝占曰辰星行軒轅中犯女主女主失勢憂喪也

宋書

天文志曰晉穆帝升平四年六月辛亥辰星犯軒轅五年五月帝崩哀帝立褚后失勢孝武太元五年七月丙子辰星犯軒轅占曰女主當之九月癸未皇后王氏崩安帝隆安三年五月辛未辰星犯軒轅大星四年七月太皇后李氏崩也列大夫有放逐者五官不治色悴為憂為

疾其所中犯乘守者若有罪石氏曰辰星在軒轅中有以女子請人君者巫咸曰辰星行犯守軒轅女主失勢一曰大人當之若有黜者期二年石氏曰入軒

轅中犯乘守之有逆賊若火災又曰犯守軒轅太民星
大流太后宗有誅者若有罪中犯乘守小民星小饑小
流皇后宗有誅者若有罪

辰星犯少微四十三

石氏曰辰星入少微君當求賢佐不求賢佐則失威奪
勢者矣又曰犯守少微名士有憂王者任用小人忠臣
被害有死又曰五官亂宰相易有兵憂矣 石氏曰辰
星入中犯乘守少微宰相易一曰女主憂不出其年

帝覽嬉曰行犯左右執法為大臣有憂 郗萌曰犯左右執法執法者誅若有罪又曰犯天庭臣為亂

辰星犯太微四十四

荊州占曰辰星道從太微西藩北南方星間入到南方東方星間南出道中西藩直坐入者非道也 春秋圖曰辰星若以立秋後七十二日得壬子入太微朝見當此之時陰氣隆盛陽氣潛藏不欲穿池決溝渠犯之冬雷 荊州占曰辰星以壬子日順入太微天子所使也

不以壬子日非天子使也 郝萌曰辰星當太微門為
受制當左執法為受事左執法當右執法為受事右執
法守太微門三日以下為受制三日以上為兵為賊為
亂為饑 荊州占曰辰星出東掖門為相受命東南出
德事也出西掖門為將受事西南出刑事也期以春秋
黃帝占曰辰星入天庭色白潤澤為期百八十日有
赦 巫咸曰辰星入太陰門西出太陰門東後宮破
若有大水期百二十日 合誠圖曰辰星入華闕門為

臣弑之候也 石氏曰辰星入太微中華東西門若左
右掖門而南出端門必有反臣若入西門出東為人君
不安欲求賢佐有入中華西門出中華東門為臣出令
入太陰西出太陰東門為天下大亂有喪若大水 郝
萌曰入太微西門犯天庭出端門為大臣伐主入西門
折出右掖門為大臣假主之威而不從主命入西華門
南出端門為臣詐稱詔入太微若入端門出東門貴者
奪勢 荊州占曰辰星入太微宮天下有聖女子出燕

代若有大水傷人民期三十日

天文志曰孝桓永壽元年七月己未辰星入太

微中八十日去出左掖門是歲洛水溢至津門南陽大水

荊州占曰辰星入太微天

庭出端門臣不臣入太微宮為天下大驚一日有兵又

曰入天庭國不安其宮又曰辰星見太微天子當之

陳卓曰辰星入太微天子之宮羣臣相殺

宋書天文志曰晉永寧元

年七月辰星入太微初齊王冏定京都因留輔政遂專權無君是月成都王穎河間王顥長沙王乂討之冏乂交

戰攻焚宮闕冏兵敗夷滅乂殺其兄王將軍寔以下二十餘人大安二年成都攻長沙於是公私飢困百姓力

也屈齊伯曰辰星入左右掖門而東出天下有憂若入端

門而守天庭強臣奪主位 黃帝占曰辰星東行入太
微庭出東門天下有急兵若守將相丞相御史大臣有
死者若入端門守庭大禍至入南門出東門國大旱若
入南門逆行出西門國大亂逆行入東門出西門大國
破亡若順入西藩而不留去楚國凶殃 巫咸曰辰星
逆行入太微天庭中為大臣有誅若諸侯戮死期二年
石氏曰辰星逆行於太微中及出左右掖門者有逆
謀天子有命將征伐之事一曰大赦可以解其患也

辰星犯黃帝座四十五

石氏曰辰星犯黃帝座改政易王天下亂存亡半

辰星犯四帝四十六

甘氏曰辰星犯乘守四帝座天下亡又曰臣謀主去之一尺事不成

辰星犯屏星四十七

甘氏曰辰星犯守屏星君臣失禮下謀上

辰星犯郎位四十八

甘氏曰辰星犯守郎位輔臣有謀左右宿衛者為亂王者宜備之

唐開元占經卷五十八

欽定四庫全書

唐開元占經卷五十九

唐瞿曇悉達撰

辰星占七

辰星犯石氏外官一

辰星犯庫樓一

郝萌曰辰星入庫樓以水起兵亦大水
荊州占曰入
天庫鉞鉞用大臣誅

辰星犯南門二

石氏曰辰星犯守南門邊夷兵起若道路不通

辰星犯平星三

石氏曰辰星犯平星凶 甘氏曰犯守平星執政臣憂
若有罪誅者期一年

辰星犯騎官四

甘氏曰辰星犯守騎官有兵起馬多發若多死

辰星犯積卒五

石氏曰辰星入積卒若守之兵大起士卒大行若多死
期二年 玄冥占曰犯積卒主失位天下亂兵大起期
百八十日

辰星犯龜星六

海中占曰辰星犯守龜星天下有水旱之災守陽即旱
守陰即水

辰星犯傳說七

石氏曰辰星犯守傳說王者簡宗廟廢五祀後宮凶一曰

有絕嗣君期不出二年

辰星犯魚星八

石氏曰辰星犯守魚星凶 甘氏曰犯守魚星之陽為
大旱魚行人道之陰為大水魚鹽貴

辰星犯杵星九

海中占曰辰星入杵星若守之天下有急發之事不出
其年

辰星犯鱉星十

黃帝占曰辰星守鯨星有白衣之會 巫咸曰國有水旱之災守陽則旱守陰則水

辰星犯九坎十一

石氏曰辰星守九坎天下旱名水不流五穀不登人民大饑一曰之陽大旱之陰大水 石氏曰犯守九坎凶辰星犯敗曰十二

石氏曰辰星守敗曰民不安其室憂失其釜甑若流移去其鄉

辰星犯羽林十三

郝萌曰辰星入羽林有反臣中兵 巫咸曰入羽林天
下兵起四夷入國人主憂一曰其國以水為憂 荊州
占曰熒惑與辰星俱入天庫軍凶若有水災 郝萌曰
犯守天陣為兵起有破軍死將 海中占曰入犯守羽
林有兵起若逆行變色成勾已天下大兵關梁不通不
出其年

辰星犯北落十四

石氏曰辰星守北落亦為兵大合女子兵起若與北落相貫抵觸光相及有兵大戰破軍殺將伏尸流血不可當也期百八十日若一年 甘氏曰守北落斧鑕用大臣有誅期不出年

辰星犯土司空十五

海中占曰辰星守土司空其國以土起兵若有土功之事天下旱

辰星犯天倉十六

齊伯曰辰星守天倉諸侯有發粟之事有兵起星若當
戶守之將受命不為主用 荊州占曰辰星入天倉中
主財寶出主憂亂臣在內天下有兵而倉庫之戶俱開主
人勝客事不成期二十日中而發 郝萌曰入若天倉
為粟發用 黃帝曰守天倉大水 荊州占曰守天倉
天下饑粟出

辰星犯天囷十七

石氏曰辰星入天囷天下兵起囷倉儲積之物皆發用

一曰御物多有出者庫藏空虛期二年

辰星犯天廩十八

石氏曰辰星犯天廩天下亂粟散出一曰天下大饑

辰星犯天苑十九

石氏曰辰星入天苑牛羊禽獸多疾疫若守之二十
日天下兵起馬多死其國憂

辰星犯參旗二十

海中占曰辰星守參旗兵大起弓弩用士將出行一曰

弓矢貴

辰星犯玉井二十一

黃帝占曰辰星入玉井為彊國失地其出之彊國得地
巫咸曰辰星入玉井國有大水憂若以水為敗水物
不成期不出年

辰星犯屏星二十二

甘氏曰辰星入守屏星諸使有謀若大臣有戮死者甘
氏曰入天屏為大臣戮若疫

辰星犯廁星二十三

黃帝占曰辰星守廁為大臣有戮者 甄曜度曰入守
廁星天下大饑人民相食死者大半期二年

辰星犯軍市二十四

石氏曰辰星入守軍市兵大起大將軍出若以饑兵
起

辰星犯野雞二十五

甘氏曰辰星入犯守野雞其國凶必有死將軍營敗兵

士散走

辰星犯狼星二十六

石氏曰辰星入守狼星野獸死 聖洽符曰辰星犯守
狼星天下多姦盜有兵起其國以水為憂 荊州占曰
守狼星大將出其國有兵一曰死將

辰星犯狐星二十七

荊州占曰辰星守狐星大將有千里之行國政驚

辰星犯稷星二十八

海中占曰辰星守天稷有旱災五穀不登歲大饑一曰五穀散出

辰星犯甘氏中官二

辰星犯四輔一

荊州占曰辰星中犯乘守四輔星君臣失禮輔臣有誅者

辰星犯平道二

甘氏曰辰星入守平道天下兵亂

辰星犯酒旗三

荊州占曰辰星守酒旗天下大酺有酒肉財物賜若爵

宗室

辰星犯天高四

郝萌曰辰星舍入天高有奇令

辰星犯積尸五

石氏曰辰星守積尸大人當之

辰星犯天潢六

黃帝占曰辰星入天潢中者為起軍道不通天下大亂
國易政一曰貴人死若中犯乘守之皆期二十日兵起
郝萌曰辰星失度留天潢中為人主以水為害若以
井為害以日入占其國若出乘天潢赦期百二十日內

辰星犯咸池七

郝萌曰辰星入咸池為有迷惑人主者 荊州占曰若
入咸池天下大亂人君死易政以入日占國 甘氏曰
有兵喪天子且以大敗失忠臣若旱一曰大水道不通

貴人死以入日占國 文曜鉤曰大水 郝萌曰大人
憂若出乘之赦期百二十日內

辰星犯天街八

郝萌曰辰星不從天街者為政令不行不出其年有兵
當天街者為諸侯自立為王一日大水若留止逆行天
街中為兵革起 石氏曰犯守天街徘徊亂行主弱臣
彊道路隔絕天下不通

辰星犯甘氏外官三

辰星犯八魁一

荊州占曰辰星犯守八魁兵大起

辰星犯鈇鎖二

荊州占曰辰星犯守鈇鎖兵起
黃帝曰入鈇鎖為大臣誅

辰星犯芻藁三

黃帝占曰辰星入芻藁中主財寶出憂臣在內

辰星犯九州殊口四

荊州占曰守九州殊口九州兵起

辰星犯軍井五

荊州占曰辰星入軍井三日以上其歲大水

辰星犯水府六

荊州占曰辰星守水府臣謀主入之水流入邑

辰星犯天狗七

荊州占曰入天狗北夷大饑來鄰國多土功若守之為
兵謀

辰星犯天廟八

黃帝占曰入若守之為廟有事一曰為凶憂
荆州占
曰為有廟殘之事吏不去則死

辰星犯巫咸中外官四

辰星犯土司空一

荆州占曰守入土司空有土徃之事一曰守之有兵

辰星犯鍵閉二

郝萌曰犯乘大臣有謀天子不尊事王者不宜出宮下

殿有匿兵於宗廟中者

辰星犯天泉三

荊州占曰守之海水出江河決溢若海魚出

辰星犯鈇鑕四

荊州占曰犯之五日以上臣有謀者 郝萌曰犯守為
鈇鑕用一曰兵將有憂

辰星犯天廐五

荊州占曰入之十日以上廐馬有食變 郝萌曰守之

三十日騎馬出
黃帝曰守之為災廐之事人主以馬
為憂不即為疾

唐開元占經卷五十九

欽定四庫全書

唐開元占經卷六十

唐 瞿曇悉達 撰

東方七宿占一

角一

春秋緯曰列宿二十八是日月五星之所由吉凶之所由兆也故石氏簿讚皆始於角而終於軫今如舊次東方七神之宿為少陽攝提建節青華叶流蒼帝靈威仰

協助所因乘也 角二星天關也其間天門也其內天庭也故黃道經其中日月五星之所行也角主兵一曰維首一曰天陳一曰天相左角為天田為獄為理主刑南三度曰太陽道右角為尉為將主兵北三度曰太陰道右角蓋天之三門猶房之四表也萬理之所由禍福之源始也故三光軌道從之則吉干僻抵觸則凶也

石氏曰角二星十二度

劉向洪範傳曰與古度同

度距左角先去

極九十一度在黃道外度金星也

巫咸占同

春夏為木秋冬

為金兩角之間是中道

鄭之分野

角一名天田一名天根右

角為尉左角為獄角者天之府庭也天門者左右角之

間天道之所治也陽氣之所升也臣之象也 郝萌曰

右角為天庭左角為天田又曰角亢秋獄角為龍角

二十八宿山經曰角山與亢山相連在韓金門山中山

中有憂變則星應於上星若有變則山應於下角亢星

神常居其上

君臣和同山星無異麒麟鳳凰芝草醴泉四時降矣

黃帝占曰視

兩角星明王道大治其星微小不明王道失政輔臣不

言角星左蒼右黃正色也吉其色白也凶王者大行百
八十日災應遠不出一年二年 角星明而潤澤朝臣
有次第兩角微小而不明天下有兵德令不行亂錯角
垂芒 角星明大王道太平 角為天將之官兩角之
間三光之道也南三度太陽道北三度太陰道日月五
星出入中道天下太平 出陽多旱出陰多雨有陰謀
乘左角法官謀南三尺獄理多冤 兩角不明天下
有兵右角赤明天下有兵左角赤明天下平 日月五

星天之三明也皆從角所行行陽道道其陽不從其
行歲大水有兵二十八宿皆同 角星明大潤澤賢
者在朝廷蒼帝德行天門為開 角主為兵動內五寸
國中兵起動外五寸邊兵起左右動搖非其常人主憂
臣弑君各以日占

亢二

石氏曰亢四星九度

在黃道內
五度半

春夏為火秋冬為水

五星

占曰亢
大也

亢北四尺是中道

鄭之分野

石氏曰亢者廟也亢

者天帝廟宮亢為天府海中占曰亢三光也三公之事下者地也中央者丞相也主享祠一曰亢亦為疏廟一名天庑主火與疾故亢龍多疾亢星齊明宗廟有敬朝廷有序星不明則輔臣失次君令不行亢星不明王者內亂星明大輔臣納忠天下平安郝萌曰亢星明大民無疾疫石氏曰亢星垂芒為亂錯亢星離落位有天子動旗而卒戰於野亢為疾國有疾占在亢秋分視亢不見五穀盡傷糴將二倍石氏曰亢為朝

廷總領四海故置平星以統理 海中占曰亢為朝廷
布政宮

氐宿三

石氏曰氐四星十五度

古十七度

距西南星先至去極九十

四度

在黃道內一度

春夏為金秋冬為水

五星入宿占氐木也

氐南二尺

是中道

宋之分野

氐天子行宮也一名天廟一名天府前二

大星嫡後二星妾前星皇后貴族府其星欲明臣奉法
度邦君安寧當大而小其位臣失勢其星動其臣出

海圖曰氏宿宮后女之貴府出入路寢之宿 氏星發
即有土功事氏為天庭氏主疫 二十八宿山經曰氏
山在鄭白馬山東氏星神常居其上 氏星明大則民
無出門之徭馬無汗勞 氏主徭役氏動者徭役起
氏為宿路寢所止故置庫樓以捍咎 氏為宿宮休解
之房

房宿四

石氏曰房四星鉤鈐二星五度

古七度

距房西南第二星

去極一百八度

在黃道外一度弱

春夏為水秋冬為火

又曰房土星也

房兩服之間是中道

宋分野

房為天府一曰天馬或曰天

駟一名天旗一名天廐一名天市一名天街一名天燕

一名天倉一名天表一名天龍

房為天子明堂王者

歲始布政之堂房為天馬主車駕房為四表表者祭也

石氏曰天道四表之間三光之正路人天之定位也

天廟者房也房者闕也日月之行常出其中不出其中為不道不道者政令不行石氏曰房主宿街南二星

君位也北二星夫人之位也房主財寶房動外財寶出動內財寶入

二十八宿山經曰

房山在宋地與心山相連房心星神常居其上房心二宿動搖則房心之山崩國有走主填星色黑出入七十日以上房心山崩下伐上也其星不明則山有音聲人民擾擾五穀貴房心星暗黑火星守之二百日房心山則音聲萬民相驚大水魚鹽五穀貴百姓愁若星色赤赤地千里房心不見帝無教房星欲明羣臣奉忠天下道興

鈎鈐天子御也鈎鈐相去疎者天下且赦相去數者天

子急多暴令關閉鉤鈴去房不駕鉤鈴離房法令王者
至孝則鉤鈴明昆弟有親親之思則鉤鈴不離房鉤鈴
去房欲其近也近則天下同心遠則天下不和房主開
閉以其蓄藏之所由也

心宿五

石氏曰心三星五度

古十度

距前第二星去極一百八度

半

在黃道外
三度半

春夏為木秋冬為水

又曰心
星火也

北四尺是中

道

宋之分野

心為天相一名大辰一名大火一名天司空

心者宣氣也心為大丞相 石氏曰心三星帝座大
星者天子也心者木中火故其色赤為天關梁 心三
星星當曲天下安直則天子失計心為明堂中大星天
王位前後小星子屬以開德發陽不欲直直王失勢期
九十日地動主客天子以弱亡 爾雅曰大火謂之大
辰房心尾也主天下之賞罰主天下之急故天下變動
則心星見不祥明堂旁多小星天子憂弱子未處天子
威令不出閣天下乖爭無君伯八九心星直心星變色黑

大人有憂民血流心星滅則主泣血后奔逃強國起
心星消江河為害期九年天子滅心星動國有急心
星動搖若角芒者天下大兵心星離移有流民心前
後星皆光明赤黃者太子庶子各有賜賀之事心三
星明大則天下同慶響風被澤太史公曰心三星上
星太子星星不明太子不得代下星庶子星星明庶子
代後心動者國有憂

尾宿六

石氏曰尾九星十八度

古九度

距東第二星先至去極百

三十四度

在黃道外十五度少

春夏為火秋冬為水

又曰水星

尾北十

尺是中道

燕之分野

尾一名後族一名天廁一名天狗一

名天司空一名天雞

尾者後宮之場也妃后之府也

上第一星后也第三星旁一星相去一寸名神宮解衣

之內室說虞之堂一曰天矢一曰天九江

尾者邊臣

也又曰通溜宮尾市也天復船也

尾第一星嫡妃也

第三星夫人也次五星嬪妾星欲均明大小相承則後

宮有序多子孫 二十八宿山經曰尾山與箕山相連
在燕九都山西尾箕星神常居其上 尾主水又主君
臣尾動者君臣不和必有事尾天子之九子也騰躍圻
絕不居其所天下大亂君臣不和 尾星明大皇后有
喜不明微細皇后有憂及疫 尾星疏遠皇后失勢尾
星明五穀大熟則民不煩擾其星不明五穀大傷尾星
離徙而直皇后失勢其星就聚有大水君臣不和則占
於尾

箕宿七

石氏曰箕四星十一度

古十度又十一度四分之

度距西北星先

至去極百一十八度

在黃道外五度少

春夏為金秋冬為土

又曰

金星也

箕北六尺是中道也

燕之分野

箕星一名風星月宿之

必大風

箕星為風東北之星也

一名天陣一名孤星主狐貉一名

風口一名天后也為天貉府廷天雞也主時金星也箕

斗天子之冠服也竝後宮別府也二十七世婦八十一御

女妾別宮四者女相也故尾箕主百二十妃尾者蒼龍

之末也直寅主八風之始 箕后星動風揚箕主致客
箕庫也一日天司空箕為寄客 爾雅曰析木謂之津
箕斗之間漢津也一日天市主八風 箕為風又箕主
蠻夷箕動者蠻夷有使來箕舌一星芒動則大風不出
三日箕舌動如致風揚沙 箕星居河邊歲大惡若中
河而居天下食人 易緯是類謀曰大山失金雞西堊
玉羊箕星明大即國無讒賊箕中少星則糴貴箕者
人之精也故天下安樂即星衆不安即星少 箕星離

徙天下大不安民移徙其處星不明天下五穀傷其星
明穀大熟其就聚細微天下憂食箕中欲其多星石
氏曰尾箕主後宮妃后府故置傳說衍子孫

唐開元占經卷六十

欽定四庫全書

唐開元占經卷六十一

唐瞿曇悉達撰

北方七宿占二

南斗占一

石氏曰南斗六星二十六度四分度之一廿氏同

洪範傳古

二十二度淮南子無四分之一度距魁第四星先至去北極百一十六

度

在黃道外二度半舊歷有四分度之一在斗度中後推校知度少為多今歷不三百四分度之一七十五

在營室一度之末 春夏為水秋冬為金

巫咸釋五星入宿吉日
凶占曰諸斗木星也

月五星常貫之為中道

吳之分野

黃帝占曰南斗一名鈇

鉞 春秋佐助期曰南斗主爵祿神名帙瞻姓拒終

石氏曰南斗魁第一星主吳第二星主會稽第三星主

丹陽第四星主豫章第五星主廬江第六星主九江 郝

萌曰南斗六星一名天庫知之使人不妄 北宮候曰

南斗一名天府天關一名天機一名天同天子旗也斗

北二星天府廷中央二星相也南二星天庫樓也天梁

也斗西大星天關也天子正旗也土官也六星欲均
明天下安寧韓揚曰南斗第一星上將第二星相第
三星妃第四星太子第五星第六星天子荊州占曰
南斗太宰位也聖洽符曰南斗者天子之廟主紀天
子壽命之期甘氏曰南斗天子壽命之期也故曰將
有天下之事占於南斗也二十八宿山經曰斗山在吳
陽羨山南斗星之神常居其上甘氏曰南斗主兵斗
動者兵起南斗星明大爵祿行天下安寧將相同

心其星不明大小失次芒角動搖則王者失政天下多憂 郝萌曰南斗星明五穀大熟其臣得勢而親近治道和平風雨順時斗星不明五穀不收移徙位直其臣逐風雨不節天下病 石氏讚曰斗主爵祿褒賢達士故曰直建星以成輔又曰斗主爵祿功德祥歲周受分
和陰陽

牽牛占二

石氏曰牽牛六星八度

古九度

度距中央大星先至去極

百一十度

在黃道
內四度

春夏為木秋冬為火

丑戌曰
木星也

日月五

星常貫牽牛中道也

吳之
分野

佐助期曰牽牛主關梁神

名略緒熾姓蠲除

北官候曰牽牛一名天鼓一名天

關牛第一兩星如連李名即路一名聚火石氏曰牽

牛六星天府也日月七政所王者即察政視牛星明大

次第相承王道大昌天下安寧牛星不明其常色其

歲五穀不成牛多災凶甘氏曰牽牛上二星主道路

次南星主關梁次南三星主南越故動搖變色從而占

之 郝萌曰天鼓星怒者馬貴 天官書曰牽牛為犧
牲 宋均曰牽牛為牛角 月食占曰牽牛為冬獄
二十八宿山經曰牛山與女山相連各法其星形牽牛
須女星神常居其上 黃帝占曰牽牛大星亡大牛死
小星亡小牛死疫中央大星不明而黃者天下芻大貴
十倍牽牛星直糴平曲糴貴牛中央大星左右出不
明大將心不正牛大貴後星前近中央大星者牛貴遠
牛賤前星左右出者前將心不正後星左右出者後將心

不正所謂前者星南星也後者星北星也牽牛不與織
女星直者天下陰陽不和 黃帝曰牽牛遠漢者天下
牛大貴其入漢中者天下牛多死 甘氏曰牽牛動牛
災四方皆然 郗萌曰牽牛明大關梁通利 牽牛主
大豆始出色黃豆賤也赤豆蟲也色青豆貴 荊州占
曰牽牛後星前近中央星者諸侯以四足 為弊色青
道病色黑死不至 牽牛星明牛貴細微不明牛賤
石氏曰牽牛生於列澤之邑以主越國為府廷 百二

十占曰將有犧牲之事占於牽牛 石氏讚曰牽牛主
關梁七政故置九坎通水道又曰牽牛險阻主關梁
中星高下牛多殃

須女占三

石氏曰須女四星十二度

古十度距西

度距西南第一星先

至去極百六度

在黃道內八度

春夏為水秋冬為火

巫咸占曰須女水星

也須女南九尺是中道

越之分野

佐助期曰須女星布帛

名色舒姓終梨時

北官候曰須女一名天少府一名

天女一名務女一名臨官女 聖洽符曰須女者主娶
婦嫁女也 巫咸曰須女天女也天府天市斗也 郝
萌曰須女主麻其色白者麻為色黃不為色青麻蟲
黃帝曰須女星欲明明則士女有緒國富民殷 郝萌

曰須女星明大則女工昌不明則法令易詩書滅絕

玄冥曰須女星明天下大豐女工有儲國充富星不明
天下虛藏不足 甘氏曰須女動則嫁娶將有嫁娶占
於須女 石氏讚曰須女主布帛裁置之故置離珠為

藏府又曰須女珍物寶所藏故主布帛奉給主

虛宿占四

石氏曰虛二星十度

古十度

度距南星先至去極一百四

度

在黃道內八度

春夏為水秋冬為金

巫咸曰虛金星也

虛南九尺是

中道

齊之分野

佐助期曰虛危為禮堂虛神名開陽 聖

洽符曰虛危天蓋也

孝經內記曰虛府廷也 北官

候曰虛主哭泣諒闇之事一名天軍市一名臨宮一名

天府一名鄉中黃鍾宮也一名兌宮一名申宮 郝萌

曰虛者生於牛山之中以為齊國府廷爾雅曰北陸

虛也

注曰北陸
虛星名也

一名天府主邑居主廟堂主祭祀主祀

禱之事

黃帝曰虛二星主墳墓冢宰之官十一月萬

物盡於虛星主之故虛星死喪

甘氏曰虛主喪事

動則有喪

郝萌曰虛危并為一體主觴客之事中

有六星不欲明見也明見則神龜用事將有哭泣之事

則占於虛二十八宿山經曰虛山危山相連在齊臣

首山中坐虛危星神常居其上

郝萌曰虛星動搖有

井田之法虛星不明天下大旱 荊州占曰虛危中有
六星不欲明見明見則有大喪近期一年中期二年遠
期三年

危宿占五

石氏曰危三星墳墓四星十七度

古九度

度距西南星先

至去極九十九度

在黃道內九度太

春夏為水秋冬為火

巫咸曰危

土星也

危南九尺是中道

齊之分野

佐助期曰虛危為禮堂神名推

長姓呂賈王 北官候曰危一名天府一名天市 巫咸曰危

為百姓市又為架構 黃帝占曰危主廟堂上視危星以主室
危星主柱主蓋屋以成帝宮以教天下其星明則天下安寧

甘氏曰危主架屋星動則有架屋之事 郝萌曰危星動搖移

徙天下謀作不解其星不明客有誅者 玄冥占曰危動搖

不明天子作宮殿民有土功事 石氏曰虛危主廟堂

祀考妣故置墳墓識先祖塋域 虛危五星為祠堂墳

墓四星祠祀享 郝萌曰危為發屋之事為蓋屋將有

蓋屋之事則占於危 石氏讚曰墳墓四星主悲諒也

營室占六

石氏曰營室二星離宮六星十六度

古二度

度距南星先

至去極八十五度

在黃道內十八度半

春夏為水秋冬為土

巫咸曰營

室木星也

室南九尺是中道

衛之分野

佐助期曰營室主軍市

之糧神名玄耀登姓婁方

皇甫謐年歷營室一名休

官地軸占營室一名鰕鱗

北官候曰營室一名玄

冥一名天官大人之宮

郝萌曰營室西壁也爾雅

曰營室謂之定

郭璞曰定正也

巫咸曰營室為天庫宋均

曰營室為舌俞角 天官書曰營室為清廟 廣雅曰

營室曰豕 聖洽符曰營室主土天子廟又曰攝提宮

府廷也 二十八宿山經曰營室山在城山東南與東

壁山相連室壁星神常居其上 黃帝曰營室二星主

軍糧離宮六星主隱藏營室三軍所立外有羽林以衛

帝其星欲明明則國昌動搖則兵出 甘氏曰營室動

有土功事 郝萌曰離宮一星不具憂子 郝萌曰

營室一星小不明禱祀不實鬼神不享一曰國家多

疫 郝萌曰將有土功之事則占於營室 營室二
星亡則輔臣病死 營室東壁四星四輔也欲
其正中有二星二舍也欲其實正猶方實其旁
多小星也 又荊州占曰四輔不正則輔臣不
忠越職賣權二舍不實則宮女淫出入不常適媵相踰
君不悉御後宮女怨曠去心 荊州占曰離宮者天子
之別宮也主隱藏止息之所也 石氏讚曰營室主軍
糧以廩士故置羽林省道理又曰營室二星主軍糧

東壁占七

石氏曰東壁二星九度

古十五度

度距南星先至去極八十

六度

在黃道內十二度半

春夏為金秋冬為水

巫咸曰東壁土星也

東壁南

九尺為中道

衛之分野

佐助期曰東壁主文章神名瞻工

姓刑孫王

北官候曰東壁一名天池一名天術 巫

咸曰東壁為天梁

孝經章句曰東壁市也又曰天市

聖洽符曰東壁主土功之事

黃帝占曰東壁失色

大小不同則王者好武經士不用圖書隱藏天下咸愚

甘氏占曰東壁主土星動則土功事興東壁星明
大王者明道術學大興國有君子 郝萌曰東壁離徙
作治田就聚以田宅為憂一日將有土功之事占於東
壁 石氏曰東壁主文章圖書府故置壘壁以衛後
石氏讚曰東壁主文章萬物犯壁本鄉 洪範傳曰北
方七宿九十九度今九十八度四分度之一

唐開元占經卷六十一

欽定四庫全書

子部

唐開元占經卷六十二至四

詳校官中書_臣李采

靈臺郎_臣倪廷梅覆勘

總校官編修_臣王燕緒

校對官庶吉士_臣潘曾起

謄錄監生_臣徐錫福

欽定四庫全書

唐開元占經卷六十二

唐

瞿曇悉達撰

西方七宿占三

奎宿一

石氏曰奎十六星十六度

古十度

度距西南大星先至去

極七十度

在黃道內十四度少

春夏為金秋冬為水

巫咸曰奎金星也

奎

南九尺是中道

魯之分野

佐助期曰奎主武庫兵神名列

常姓均劉方 西官候曰奎一名天庫一名天邊偏將
軍武庫軍庫也 奎者天之玄冥也溝瀆陂池江河漢
也其木榆也其物牛筋革奎金星也 天官書曰奎曰封
豕一名天豕 詩緯曰奎為女令 聖洽符曰奎者溝瀆
也 孝經章句曰奎府廷也 巫咸曰奎為天庫又曰奎婁
春獄 郝萌曰將有溝瀆之事則占於奎其西南大星所
謂天豕目者也亦曰大將故欲其明也 玄冥占曰奎
大星大將軍其欲明而行列兩頭免近河以候水兵芒

角動搖進退國必用兵或曰有赦令二十八宿山經
曰奎山婁山相連奎婁星神常居其上黃帝曰奎星
芒角動搖國必有兵不出年中河圖曰帝淫佚政不
平則奎有兵文曜鉤曰奎星直期九年主弑天下無
文法兵官營壘不寧甘氏曰奎星動有溝瀆之事

郝萌曰奎頭大星色黃忽然不明者將軍叛王也非其
舊故黃也荊州占曰奎中星明者水大出石氏讚
曰奎主軍兵禁不時故置將軍以領之又曰奎主庫兵

秉統制政功以成

婁宿占二

石氏曰婁三星十二度

古十五度

度距中央星先至去極八

十度

在黃道內十二度

春夏為水秋冬為火

巫咸曰婁水星也

婁南九

尺是中道

魯之分野

佐助期曰婁主苑牧神名及方姓台

衛黃帝曰婁主宗廟五祀一名天府郊太牢也西

官候曰婁一名密官一名國市一名天廟庫婁者天獨

祿車也主為聚衆之事其木柱也其物鉛錫銀黃金石

聖洽符曰婁者聚衆也 孝經章句曰婁市也 巫咸
曰婁為天獄 郝萌曰有聚衆之事則占於婁 海中
占曰天子孝則婁星明大天下太平 郝萌曰婁星直
有執主之命者就聚國大不安一曰星明大則賦斂時
玄冥占曰婁星明則王者郊祀天享之天子明臣子
多忠孝王者多子孫天下和平婁不明大小失色不修
五祀 石氏譌曰婁主苑牧給享祀故置天倉以養之
婁主苑牧有掩斂蓋藏以春營

胃宿占三

石氏曰胃三星十四度

古十度

距西南星先至去極八

十二度

在黃道內十二度

春夏為木秋冬為水

巫咸曰胃金星也

胃南

九尺是中道

趙之分野淮南子洪範傳曰魏分

佐助期曰胃主廩倉神

名稽覽姓研胥白

西官候曰胃一名天中府一名密

官為兵為喪

金星也

聖洽符曰胃者倉廩也

孝經章

句曰胃者庫也

天官書曰胃者天庫

百二十占曰

胃為天府藏也

郝萌曰將有倉困之事占於胃 二

十八宿山經曰胃山昂山東與畢山相連在趙常山中
央其山最高大胃昂畢之神常居其上 甘氏曰胃動
有輸運之事胃星明者王者郊天得福天下和平星不
明大小失位 海中占曰胃星明大王者須祀則壽命
長子孫昌 郝萌曰胃星明大倉廩實胃星離徙倉穀
不出其星就聚穀大貴民流於道 荊州占曰胃中星
衆者穀聚星少穀散 石氏讚曰胃主倉廩五穀基故
置天囷以盛之 又曰胃宿三星主倉廩陰收積聚

云一

萬物積聚知入藏

昴宿占四

石氏曰昴七星十一度

古十五度

度距西南第一星先去極

七十四度

在黃道內四度少

春夏為火秋冬為金

巫咸曰昴火星也

昴

南九尺是中道

趙之分野淮南子曰魏分

佐助期曰昴主獄事神

名教姓金宋趙勝

西官候曰昴一名武一名天廚一

名天路胡星主兵主喪其一星亡邦有兵水星也 甘

氏曰昴茅也

郝萌曰昴有一星大名黃星其星明者

天下安不明者天下大凶 巫咸曰昴為天耳目 黃

帝曰昴星天牢獄也王者承天以利獄事以檢淫奢其

星不欲明明則天下多獄者 春秋緯曰昴為旄頭房

衡位主胡星陰之象 聖洽符曰昴者白衣

巫咸曰昴為白衣聚

又曰胡聚 孝經章句曰昴市府廷也 郝萌曰將有

白衣之會則占於昴 爾雅曰西陸昴也一曰天獄

石氏曰天街者昴畢之間陰陽之所分中國之境界

天官

書曰陰陰國陽陽國孟康曰陰西南維河山以北國也陽河山以南國也

元命包曰帝位

明即昴星光大 甘氏曰昴星明天下多犯獄昴星動
搖必有大臣下獄又曰有白衣之會又曰昴星大而數
動盡跳者胡兵大起不出年中又曰昴一大星跳躍餘
皆不動者胡欲侵犯邊境期中或三年 郝萌曰昴
星明大則牢獄平昴星皆明與奎星等者水滿天下
昴七星黃道起 昴有一星亡者多兵為喪 五官
書曰白帝行德畢昴為之圍圍三暮德乃成不暮及
圍不合德不成 石氏讚曰昴主獄事典治囚故置

卷舌以慎疑 昴主獄事繫凌淫化伐所犯謀是當

畢宿占五

石氏曰畢八星附耳一星

附耳主聽察也

十七度

古十五度

度距左

股第一星先至去極七十八度

在黃道外六度太

春夏為金秋

冬為水

巫咸曰畢火星附耳水星也

畢北七尺是中道

趙之分野王者執畢前驅

即其象也一曰囚車今掩免者曰畢亦其義也故主弋獵其大星曰天高一曰邊將邦外候也淮南子曰魏分

野

佐助期曰畢主邊兵神名扶骨姓傅兒侯 皇甫

謚曰一名天耳一名天目一名風口 西官候曰畢一

名濁一名天罡一名天都尉主制候四方 聖洽符曰
畢者揚兵一曰清池宮 河圖曰畢為天罡也 孝經
章句曰畢府廷也 巫咸曰畢為天獄 郝萌曰畢主
山河以南中國也中國於四海內則在東南為陽陽則
曰歲星熒惑填星占於街南 春秋緯曰畢罕車為邊
兵主戈獵陽微掇故置附耳在大星旁司天下搖動讒
臣亂主 春秋緯曰畢為邊界天街主守備外國故立
附耳以聞不祥 郝萌曰將有田獵之事則占於畢

黃帝曰畢左股大星邊將也主邊邦胡狄候五帝三王
壘外域其國倍叛其星耀芒其星欲明明則遠夷來責
失其色大小不如其故則邊境還自亂中國不寧天以
畢罪掃姦雄平通外域西官候曰畢大星邊將軍也
星動有芒角邊將有急百二十占曰畢主弋獵為陽
國昴為陰國日月五星出陽國即有水入陰國即早上
教不行黃帝曰其國背叛畢星耀芒元命包曰畢
星光大色度和同天下太平國號未央郝萌曰畢星

動搖有讒臣畢一星亡為喪一曰為兵畢中星出國內
亂一曰國無主畢星明大則邊無近遠夷貢來王廷中
畢離移天下獄大亂其星就聚法令大酷其明太平不
明天下謀為亂列宿說曰畢星動者邊城有兵起
石氏曰附耳著畢司銜候邪巫咸曰附耳火官也

黃帝曰附耳搖動有田之事洛書曰附耳角動讒賊

將起春秋緯曰附耳明賊動

宋均曰賊盛也

中國微邊兵驚

外國交關連年大將虜主敗失附耳搖動非其處有亂

臣在側者一曰主憂愁 論語識曰附耳明盜賊令

郝萌曰附耳入畢口直一星期四十日直二星期三十日直三星期二十日直四星期十日直五星期七日直六星期三日兵起附耳入畢中為兵革入深大附耳縮結王命興輔佐出附耳動兵大起邊兵尤甚石氏讚曰畢主邊兵備夷謀故置天弓以射之畢為天街主邊兵守備境界知暴橫附耳移動讒邪行

筭觚占六

石氏曰觜觿三星一度

古六度

度距西南星先至去極八

十四度

直黃道外十二度太

春夏為水秋冬為土

巫咸曰觜金星也

觜北

三尺是中道

晉魏之分野淮南子曰趙分

西官候曰觜觿主斬刈

左足一名白虎將一名天將斧鉞白虎首主外軍其外

梁也其內魏也其木楊其物錢金器礮石金星也聖

洽符曰觜觿參伐天市梁也石氏曰觜觿者內主梁

外主巴漢一曰觜觿者三軍之候也巫咸曰觜為寶

貨又為天貨天官書小三星隅置曰觜觿為白虎首

主葆旅之事

如淳曰關中俗謂桑榆蘗生曰葆
晉灼曰葆菜也野生謂之旅

列宿

說曰觜觿動葆旅起將有葆旅之事則占於觜 二十

八宿山經曰觜觿山與參山相連在魏天山西南觜參

星神常居其上 甘氏曰觜觿三星行軍府藏也其星

欲明明則國盈軍有儲其星不明不以出軍行將天下

軍士無食王者將出必察其星 百二十占曰觜大皐

其星明則盜賊衆 石氏曰觜星動明寇戎發盜羣行

郝萌曰觜星近參左股臣有謀其君者若主之命奪

主之藏近右股大臣謀伐其主若有大命 觜星明大將得勢 石氏讚曰觜參主葆旅收斂故置參伐山相助

參宿占七

石氏曰參十星十度

古度同

度距中央西星先至去極九

十四度半少

在黃道外二十三度半

春夏為水秋冬為土

巫咸曰參金星

也參北十三尺是中道

晉魏之分野左氏傳子產曰昔高辛氏有二子伯曰閼伯季曰實

沈不相能尋干戈以相征伐注曰尋用也傳曰后帝不臧注曰后帝堯也傳曰遷閼伯於商丘主辰注曰商丘

宋地主祀辰星大火也傳曰商人是因辰為
商星遷實沈於大夏主參淮南鴻烈曰趙分

佐助期

曰參伐主斬刈神名虛曷姓祖及黃帝曰參應七將

也中央三小星曰伐天之都尉也主胡鮮卑戎狄之國

故不欲其明也孝經章句曰參伐市府廷也又為天

尉巫咸曰參為衡石氏曰參伐一名鍾龍天官

書曰參為白虎三星直也為衡右下有三星銳曰罰

晉灼

曰星邪列為銳為斬刈事其外四星左右扇股也參一名伐一

曰大辰一曰天市一曰鈇鉞又為天獄彗星要占曰

參者天之市也伐者天之都尉也天之車騎也與狼狐
同精天之候蜀也主南夷戎之國一曰晉地 王厯曰
參中央星主命左星主左司馬右星主右司馬左臂主天門
右臂主天獄 西官候曰參左大星左將軍也右大星
右將軍也中央三星三將軍又三小星小將軍也主胡
鮮卑越野諸君王也其星動搖兵起 聖洽符曰參者
白虎宿也足入井中名曰滔足虎不得動天下無兵足
出井外虎得放逸縱暴為害天下兵起 元命苞曰參

主斬刈所以行罰也又主權衡所以平理也又主邊城
九驛故不欲其動也參白虎之體也其星三列三將也
東北星曰左肩主左將軍西北星曰右肩主右將軍東
南星曰左足主後將軍西南星曰右足主徧將軍黃
帝占曰參星天右將軍也天市石武金性剛強斬刈平
時參應七將其中三星列三將也右肩右足右將也左
肩左足左將也白虎性有怒左足下有井星動而陷之
以節其勢凡七將明大天下之兵精衛帝有方茂明芒

角又張赤燿橫射三軍駭動帝自躬甲 郝萌曰參
為橫衡不正天下傾 百二十占曰參為將軍常以夏
三月視參兩足進前兵起若退却兵罷國寧又視參兩
星動搖則兵起子有憂一曰蟲苗 易緯曰參無頭國
分兵彊 聖洽符曰參伐者衣冠衡石天子之師也

春秋緯曰參伐滅絕臣弑君子弑父 石氏曰參左足
不入井中兵大起參星不欲動動則兵起其星不具其
軍亡地星失其色其軍散敗蹉跎不常王臣不忠外其

心 參中央星差南胡人入塞復正胡人出 郝萌曰
參星移名曰失天客伐主人明動者兵軍大起參兩肩
外向而大者兵外彊其內向而大者兵內彊 參左股
亡則東方南方不可舉兵右股亡則西方北方不可舉
兵 參左足入玉井中兵大起天下大水若其有喪山
石為怪 參為天刑主伐星大則兵起進退迫居及客
番息皆為刑急 參星明者大將執勢奪去威權天下
變易 參星不明大將疾 參星離處大將逐就聚大

將誅戮 參中央星差北胡人北 荊州占曰參星芒

角動搖邊候有急天下兵起 參肩細微天下兵弱

石氏曰參四足有進者將出有退者無功失勢進者謂

移北也退者謂南也 春秋緯曰伐有角黃芒天子滅

春秋緯曰數世絕則伐生角 合誠圖曰伐有角諸

侯之寢排門閤 甘氏曰參伐動者有斬伐之事 巫

咸曰伐水宮也 郝萌曰參伐星明大則斬刈行 伐

三星去疏則法令緩數則法令急 伐三星不欲明明

與參等者天下大臣皆謀去其君是謂不理 伐星大
則兵起 百二十占曰伐星移南胡山塞移北胡山塞
石氏讚曰參伐斬刈陰氣孳故置玉井以給厨 參
伐主斬刈摧傷九州合謀自敗失 劉向洪範傳曰西
方八十三度今八十度

唐開元占經卷六十二

欽定四庫全書

唐開元占經卷六十三

唐瞿曇悉達撰

南方七宿占四

東井占一

石氏曰東井八星鉞一星三十三度古二十九度度距北南

轅西頭第一星先至去極七十度在黃道外二度半春夏為火

秋冬為水巫咸曰東井水星也日月五星行貫井是中道秦之分

野黃帝占曰東井天府法令也天讒也一名東陵一名天井一名東井一名天關一名天闕一曰天之南門三光之正道行不出其中為天下無道三光行經其中不得留守東井主水用法清平如水王者心正得天理則井星正行位主法制著明左垣四星四輔也右垣四星以輔赤帝井中六星主水衡其星明大水橫流孝經章句曰東井為天渠巫咸曰東井為天亭天候又曰井鬼夏獄廣雅曰東井曰鶉首玉歷曰東井曰

天齊 齊伯曰東井天渠也主於員山又為其國市

何法盛懸象說曰井女主之象也 百二十占曰東井為

天池 二十八宿山經曰東井輿鬼山在秦火山南井

鬼星神常居其上 聖洽符曰井鉞星大而明斧鉞且

用兵起 易緯曰鉞星明主自通諸侯亂 石氏曰東

井墮天下涌水 井鉞去則水滿 甘氏曰用法平王

者心正則井星明行位直 鉞星明則臣多犯罪者

海中占曰井鉞一星司淫奢其星不欲明明則斧鉞用

以斬伏誅之臣 焦延壽曰天鉞星不與井齊則大臣
有斬者以欲然也 郝萌曰斧鑕用王命與輔佐出 石
氏讚曰東井主水衡以平時故置鉞星斬淫奢 東井
八星主水衡井者像法水法水平定執性不淫故主衡

輿鬼占二

石氏曰輿鬼五星四度古五度度距西南星先至去極六

十八度

在黃道
內太

春夏為火秋冬為水

正咸曰
鬼土星

輿鬼南六

尺是中道

秦之
分野

郝萌曰弧射狼誤中參左肩輿尸於

鬼鬼之言歸也 南官候曰輿鬼一名天鈇鎖一名天
訟主察姦天目也 孝經章句曰輿鬼為夏獄又曰天
金玉府也又名天匱天墻其星明則兵起而戰不用節
無兵兵雖在外不戰 黃帝占曰輿鬼南星

石氏曰南
二尺一星

積布帛西星

石氏曰西
二尺一星

積金玉北星

石氏曰北
二尺一星

積銖錢東

星

石氏曰東
二尺一星

積馬中央星積尸

石氏曰鬼東北一星

主積馬東南一星主積兵西南一星主積布帛西北一

星主積金玉此四星有變則占其所主也中央色白如

粉絮者所謂積尸氣也一曰天尸故主死喪主祠事也
一曰鈇鎖故主法主誅斬 郝萌曰輿鬼中者為鎖鬼
星章明人民更相請召五穀熟成 玉歷曰輿鬼為

天尸朱雀頸中星如粉絮鬼為疫害 南官候曰輿鬼
者天廟主神祭祀之事其國泰也其木楊也其物馬牛
羊虎也 郝萌曰輿鬼星明大歲熟不明民大散其星
移徙民大愁政令急 輿鬼星皆動其色瞳瞳望之若
有光上賦斂重數徭役繁多萬民悲怨不出五年身死

家亡又曰見此災後連年大水秦國尤甚 輿鬼質星
欲其忽忽不明不明則安明則兵起斧鉞且用 石氏
讚曰輿鬼視明察姦謀故置五諸侯以刺之 輿鬼五
星主視明從陰視陽不失精

柳占三

石氏曰柳八星十五度

古十八度

度距西頭第三星先至去

極七十七度

在黃道外十二度

春夏為水秋冬為火

巫咸曰柳土星

柳

北六尺是中道

周之分野

南官候曰柳天府也一名天相

一名天大將軍天少府也其國狄也其木桑也其物羊豕也 爾雅曰味謂之柳柳鵝火也一曰注音相近也

聖洽符曰注者木功也 孝經章句曰柳天庫也

巫咸曰柳為木官主工匠又曰柳為天庫 天官書曰柳為鳥注主草木 齊伯曰柳者生於道澤之山為其

國府庭也

郝萌曰將有木功則占於柳 二十八宿

山經曰柳山七星山張山皆相連在周嵩高山東北柳

七星張星神常居其上

黃帝占曰柳者朱雀頸也

主卿相大臣之厨凡八星以防詐偽其星欲明明則大臣重鎮以防不虞其不明王者失令宮室不安 春秋緯曰參注滅絕臣弑君子弑父 郝萌曰柳星位直天下謀伐主其星就聚兵滿國其星不明德弊離其星明國安昌 注星明厨養具 注舉首王命興輔佐良石氏讚曰柳主上食和味滋故置天稷以祭祀 柳主上食長養形仁以行恩成其名

七星占四

石氏曰七星七度

古十三度

度距中央大星先去極九十

度

在黃道外二
十一度少

春夏為火秋冬為水

巫咸曰七
星水星也

七星北

十三度是中道周之分野

黃帝占曰七星赤帝也一

名天庫一名天御府於午火隆入中宮德於土星主衣

裳帝冠被服繡之屬

皇甫謐曰七星一名延頸

南

官候曰七星一名天員天府也主保葆旅之事

玉歷

曰七星一名天河

百二十占曰七星為員官一名津

橋

宋均曰注候七星也

聖洽符曰七星者倍海也

巫咸曰七星為賜貨又天廷 天官書曰七星頸為
天員官主急事 郗萌曰七星為天帝守諸羣盜賊

列宿占曰七星主兵 黃帝占曰七星正主陽朱雀心
也星主衣裳鳥之翅也以覆鳥身以主衣裳也其星欲
明明則王道大昌君子家不隱賢人不逃藏其星不明
中輔逃亡賢良不處天下虛空王者開四門則七星光
澤天援網紀 甘氏曰七星動者兵起 郗萌曰七星
大則泉麻熟成 七星明執政者平不明天子疾 七

星離天下易政家殊計 石氏讚曰七星主衣裳蓋身
軀故置軒轅裁制之又曰德歸好性信有成故以衣裳
屬七星

張宿占五

石氏曰張六星十八度

古十度

度距應前第一星先至去

極九十七度

在黃道外二十六度半

春夏為木秋冬為水

巫咸曰張水星

也張北十三尺是中道周之分野 南官候曰張為天

府也一名御府寶文王神之藏也一名天王被服也一

名天倡其星明即天子昌 齊伯曰張者生於江水之
山為天庫一曰生於道釋之山為周庫又為都官 黃
帝占曰張天府也朱雀素也主帝之珠玉寶宗廟所用
天王內官衣服其輔帝中宮內張外翼以衛帝宮 聖
洽符曰張者主酒食 孝經章句曰張為天相王者珍
寶物宗廟所用其西四星四輔也帝宮內翼外張以匡
帝宮 天官書曰張素為廚主觴客 南官候曰張者
為廚主觴客之事其木梧桐其物粟雞狗羊皮其國周

也列宿說曰張主賞與星動者有賞與之事黃帝

占曰張星明大則王者行五禮得天下之中其不明修
禮退金官以木官代之則星光明海中占曰張星不

明王者少子孫郝萌曰張星明大則厨養具若張星

不明多病者移徙者天下有逆民就聚者有兵石氏

讚曰張主賜客賓主嬉故近一本云故置之少微禮義時張

主長養位盛陽人君向治統綱紀

翼宿占六

石氏曰翼二十二星十八度

古十度

度距中央西星先至

去極九十九度

在黃道外二十度半

春夏為金秋冬為土

巫咸曰翼金星

也翼北十二尺是中道楚之分野

南官候曰翼主天

昌五樂八佾也一名化宮一名天都市一名天徐以和

五音 石氏曰翼天樂府也主輔翼以衛太微宮法九

州之位入為將士相繩直有例內外小星四十六官各

隨其度小臣之象也 聖洽符曰翼者賓客也 孝經

章句曰翼者市也 百二十占曰翼為天倡倍海也天

旗天都也其國楚其木茱萸也其物轅幹也奴婢毛羽
節器也 黃帝占曰翼和五音調笙律五輔以衛太微
宮九州之位入為宰相其星明則帝德明王者納賢徵
聖有進言之慶禮樂大興天下和平其星不明天子有
憂將有負海之客禮樂不和律呂不調 巫咸曰翼天
羽翼又為負海 天官書曰翼為羽翮主遠客 二十
八宿山經曰翼山軫山相連在楚門山中央最高翼軫
星神常居其上 郝萌曰將有負海之事則占於翼也

列宿說曰翼主蠻夷其星動則蠻夷來見天子者

黃帝占曰翼星光芒明帝臣羣聖三王清徹聖賢有期
集會之慶禮樂大興天下和平 郝萌曰翼明大則四

夷賓服 翼星徙天子舉兵征伐其星就聚天下相伐
其星明旗用其星不明天下無憂 石氏讚曰翼主天
倡以戲娛故近太微竝尊嬉 翼二十二星主天倡建
旗秉節物滿張

軫宿占七

石氏曰軫四星長沙一星轄二星十七度

古十六度

度距西

北星先至去極九十九度

在黃道外十五度少

春夏為木秋冬為

土

巫咸曰軫金星也

軫北十三尺是中道楚之分野

南官候

曰軫一名天志主風死喪東小星轄西小星轄膏軫同

合邊兵起膏去軫二尺所進近軫名為天膏轄者車騎

發膏轄反故車騎罷遠兵息 聖洽符曰軫者車事也

孝經章句曰軫府廷也車也

巫咸曰軫天庫楚國

星也會稽也軫天子政朝也

南官候曰軫者天員府

也其國楚也漢江荆湘衡也其木松柏弓其物青帛
也齊伯曰軫者生於蒙山長為楚之國為府廷黃
帝占曰軫主察凶災冢宰之臣四輔也天官書曰軫主
風黃帝曰軫者以候王者壽命故置長沙一星主延
期軫二星主侯王左軫為同姓右軫為異姓長沙軫星
欲明明則壽命長天下不亡也細微亡不見七日其位
王侯當之天官書曰長沙星不欲明明與四星等若
五星入軫中兵大起郗萌曰軫北小星去軫數寸者

輶也輶明與四星等若輶進退兵大起軫南小星去軫
二尺者膏也輶進膏博軫是謂天亡膏三日車騎發輶
膏各反其處車騎罷有兵而輶遠軫者兵罷 百二十
占曰軫為天車車失輶則傾 郝萌曰軫星明大則車
駕備 軫星及長沙星明天子內佐親彊 軫星移徙
天子憂謀兵其星就聚兵大起 軫星流不正又無一星
如車無輶國主憂 將有軍出入則占於軫 軫輶舉
南蠻侵 列宿說曰輶星動車騎用 石氏曰輶二星

不欲明明則輜車行罔輶欲進相去七寸相去一尺以外
皆凶 郗萌曰軫星明兵大起 百二十占曰輶星動
搖三月車馬大凶 黃帝曰長沙明則主壽長 洛書
曰長沙明下大臣逆謀兵乃生 春秋緯曰長沙左輶
中星不欲明明與四星等兵大起 石氏曰長沙星明
王者保慶子孫昌 巫咸曰長沙明天子壽豐 石氏
曰軫主死喪知凶災故設長沙以延期 石氏曰軫四
星主死喪建時立節威嚴莊春王小終季夏殃 巫咸

曰長沙木官也 長沙一星主囚亡 洪範傳曰南方
一百七度今一百十二度

唐開元占經卷六十三